

Š E N T E N I J A M E S O P U S T A

|| Z D A J N I K

S U Ā A

RENE ŠEVERDIJA

A B U K A T

DANIEL GRBIĆ

A U T O R

UDRUGA ZA MESOPUSNE OBIČAJE

B R I B I R

SUDAC

Pozdravljan te mili grade
Spred Udruge i parade
Spred onih ča ovo pišu
Za običaj naš ča dišu.

Si žitelji ti pozdravljan
Nikogar ne zaboravljan
Bribircih po celon sviti
Kin ne raste pelin z riti.

Ima ih na sakoj strani
Med črnimi i klokani
I onih ča priko bare
Paze da se ne zatare.

Z gušton jedan pozdrav lipi
Prezidentu našen Stipi
Neka se i dalje smije
Kadagod nek se obrije.

Vela pusa premijeru
Nek manje po njemu seru
Zač odvezal je konopi
I privezal nas k Evropi.

A najveći pozdrav z bini
Generalu Gotovini
Zbog njega mij suza v oku
Pa gren sudit ovu stoku.

„IZDAJNIKU“ tu ću sudit
Niš mu dobro nen ponudit
I goru san gamad ubil
Parnicu još nisan zgubil.

TAMBUR

- 1 -

Udruga za mesopusne običaje Bribir

zahvaljuje svim sponzorima,

a posebno:

OPĆINI VINODOLSKOJ

GRAĐEVINSKOM OBRTU „ARCUS“

TURISTIČKOJ AGENCIJI „KATARINA

LINE“

**Hvala Vam na donacijama i
nagradama!**

Predsjednik Udruge:
Daniel Grbić

ABUKAT

Samo neka sudac sudi
I ja vas pozdravljan ljudi
Obaveza mij velika
Da obranin „IZDAJNIKA“

Ja klijenta svoga volin
Pomoć nikogar ne molin
Nij kriv ča se loše živi
Ča govna ne teku v civi.

Pred leto dan sej spojeno
Va pogon još nij pušteno
„MAXELL“ deloj bil načinil
Ali niki nij to finil.

Vele bit će vavon leti
Pospajat će nan šekreti
A po čijoj su nan kazni
Zavik vikon žepi prazni.

Dica se se manje smiju
Alkohol se više piju
Kurbarijaj njin po strani
Bitnoj da su nalokani.

Ča dela nij ni za lika
Nemoj krivit „IZDAJNIKA“
Neć dokazat mu krivicu
Ni za praznu Viševicu.

Ni državni nećeš dugi
Pripisat mu vavon krugi
Porotnici nisu slipi
Nij kriv ni zbog tiče gripi.

TAMBUR

SUDAC

To ću kašnje komentirat
Va tu bolest nen se dirat
Sad se malo neću šalit
Općinarih gren pofalit.

Gorika se dobro dela
I na kulij nikla skela
I cistaj sad od formata
Od Velih do Malih vrata.

Oni nisu pali v krizu
„IZDAJNIK“ ne more blizu
Optužnicaj dosta teška
Genetskaj on valjda greška.

Općinuj on tel podilit
I na tujen drva pilit
Ni županu nij dal mira
Zač da žena muj z Bribira.

Kriv je on narode dragi
Ča su generali v Hagi
Ča in Karla pravdu kroji
Ja ću njemu ljudi moji.

Kriv je poreć se ne more
Ča nan tuji zemlju ore
Brazilac nan himnu piva
Ča se to sa nami zbiva.

Zapitat sej čaj to s nami
Si su bolji neg mi sami
Zatu bolest nima lika
Dok ne maknen „IZDAJNIKA“

TAMBUR

- 3 -

Poslijednji pozdrav starom kapetanu

Josipu Plovaniću - Iveši

i

bivšem predsjedniku Udruge

Zdenku Antoniću

Uvijek ćemo Vas pamtiti kao zaslužne članove
Udruge za mesopusne običaje Bribir.

POLAK OBIČAJA I NAVADE STARE

ABUKAT

Ja pomalo gren na miri
Reč čaj novo va Bribiri
Na Gracu to si već znaju
Se se više mačkaraju.

I po kućah i va domu
Najsložniji su va tomu
Celu zimu a i v leti
Mačkare su na pameti.

Zajednicaj ova mala
Vlasnik letnjeg karnevala
Ki prvi put bil je lani
V igrališću na pilani.

Po pet kun sej tamo pilo
Celo selo sej skupilo
Volonterski si delaju
Tamburaši njin sviraju.

Postavaj i kletu ista
Petica za potez čista
I maj kad va seli dižu
Tamburaši valje stižu.

Ondaj totu gozba cela
Stižu pladnji z celog sela
Da ne budu usta suha
Suzana njin vino kuha.

Bura dere se kroz kosti
Ali fešte nikad dosti
Se va pismi i va smihi
V garaži su već u Tihi.

I neka se ovo čuje
Picljin pisme naručuje
Skupe pisme toj istina
Saka želja dupljak vina.

I kad misliš daj gotovo
Onda stiže društvo novo
I to ono odabrano
Tićak, Draško i Silvano.

Tek sada se pravo dimi
I Šimac je totu šnjimi
Svedočil je on izbliza
Sceni Draškovog striptiza.

Gaće slači i brageše
Livun rukun jaja češe
Med nogami visi sprava
Ko u malo većeg brava.

Da ne dela va „Murvici“
Zišal bi na duplerici
Striptiz opet za par dani
U ženi na rođendani.

Puna kućaj tamo bila
Porno glumcu se divila
Erotika daj to živa
Ni pred kin on niš ne skriva.

Istinaj to ljudi fina
Sad ga išće Severina
Oće da ga zase ima
Va dueti šnjini da snima.

TAMBUR

Pozdrav mu i kumpaniji
Nediljun su va birtiji
Puno sriće vavon leti
Na briškuli i trešeti.

Na krajij va svojoj tugi
Nič ostavil i Udrugi
Čestital in je na trudu
Predložil ideju ludu.

Ostavil in je za kletu
Sto lutak v jednon paketu
Lutke su od plastičini
I va ljudskoj veličini.

Pa neka ih onda v šali
Posidaju gori v sali
Pročut će se onda nato
Daj Bribiri se krcato.

JEL PUNA IL PRAZNA SALA
JOŠ HRVATSKA NIJ PROPALA.

Eto sad bi bilo ovo
Skoro naše zadnje slovo
Nadan se da nismo bili
Kogagod i uvredili.

Još ću reć van dvi tri zgodi
Mesopustu na sprogori
Si pridite na Čokovo
Važgat ćemo govno ovo.

TAMBUR

Mladen slučaj lovi valje
Pa zgoru ekipu šalje
Ne pozna ekipa ova
Daj stavljena tabla nova.

Čuli su ča gazda veli
I sikire v ruki zeli
Po drvih su tu opleli
Tablaj brzo va kaseli.

Jedna stvar me ovdi dira
Ti su dečki iz Bribira
Trefil Željka šok je veli
Kad je spazil nij tabeli.

Išće tablu po Barbari
V pomoć zove i žandari
Zamršen je slučaj celi
Niti traga od tabeli.

«IZDAJNIK» je zavu bruku
malo minjal oporuku
ostavil je niku paru
komunalnomu redaru.

Nek kupi novu tabelu
Il po staru gre va «Jelu».

TAMBUR

SUDAC

Bocu jednu stranog pića
Za Ljubuj čuval Škodića
Nigdaj dosti bilo i živo
Dok je pisal ovo štivo.

SUDAC

I ja Gracu skidan kapu
I pružan in desnu šapu
Mačkarani v noći gaze
Celi Bribir obilaze.

Pa pivaju i popiju
Spravni i za pizdariju
Začula sej fanjska buka
U Darka su bili Čuka.

Sila težej Miću vukla
Paj stolica pod njen pukla
Prevelika nij tu šteta
Još je jedna od kompleta.

I na njoj se mili Bože
Mićo Tomić lipo vože
Štefij va oki tuga
Pukla pod njen je i druga.

Pa Darko mora po nove
Ovih dan do Palmanove
Za popit su šanse male
Jedino kad gredu v Štale.

Kot za žandarskoga sata
Zaprta kušuju vrata
Vele njen ne hote simo
Prošloj devet mi već spimo.

A v Podgori to već znate
Sagdi lipo te prihvate
Vesel narod toj milina
I sagdij domačeg vina.

Gradac grupaj bome fanjska
Duplo veća nego lanjska
V Podgori se rano kreće
Nikogar promašit neće.

Veseli su i fanj piju
Fantu, vino i rakiju
Jedino njin malo smeta
Palma u Nadi z Buffeta.

Niki pametan sej sitil
Paj pod palmun oganj snitil
Zgorelaj za minut cela
Nij ostalo ni popela.

Javnu ispriku su Nadi
Izrekli na tanci v gradi
Za oproštaj totu prose
I sadnice nove nose.

Mlade palme sorta ista
Nisu one z Novog lista
I ove se Bože sveti
Ne motaju v cigareti.

Zamiril sej Gradac popu
Šli su korak va Evropu
Prevršenaj saka mera
Oženjena dva pедера.

I svadbenu tortu rižu
Kadi muški se dosižu
Podrška z Evropi stiže
Tamo saki sakog liže.

ABUKAT

Sul saznali novinari
Za tabelu na Barbari
Na toj tablij plan Bribira
Al joj bura neda mira.

Puhalaj i toga dana
Kad je tabla zičupana
Željko Tomić za nju mari
Brzo zove općinari.

I dobiva obećanje
Popravljeno bit će stanje
Šetemanuj čekal celu
Niki nij digal tabelu.

Ideje sad ima nove
Franu Šumperinca zove
Frane tu se posla lovi
Za par ur on se zgotovi.

Povaril je brage prvo
Dugi črafi klal kroz drvo
Nij na sviti toga vetra
Da ju makne milimetra.

Stoji ona sad ko nova
Al još priča nij gotova
Isti dan za tablu mari
Gradski komunalac Hari.

Pa Mladena zove v «Jelu»
Da poberu tu tabelu
Zač da ona slabo dura
Stalno da ju ruši bura.

Još ostavlja rad potribi
Žarku Tusu slane ribi
Našumeli su se slatko
Baš na Badnjak on i Vlatko.

Z jedne tegli tu su bili
Slane ribe se pojili
A kako su bili v cugu
Žarko prnest gre i drugu.

Već su pol te druge bili
Prožvakali i pojili
Prišloj skoro tu do svađe
Te su ribi puno slađe.

Tepliloj njin vino uše
A va tegli oskoruše.

Još za Vladu i Mariju
Novu letnju konfekciju
Priko zime su se bili
Baš lipo zaokružili.

Radi jedne bokserice
I pelene pampersice
Sin mu v gaće već ne piša
Toj za njegovoga miša.

TAMBUR

Tamo nan je kumpanija
Naši Vlade i Marija
Na Evropu se ne tuže
I euri tamo služe.

Ne na kopnu neg na vodi
Zaposleni su na brodi
Vlade pomorac je stari
A Marija kormilari.

Sega daj va izobilju
Zgoru te povuč i Vilju
Samo neka plove dalje
Udruga in pozdrav šalje.

I još jedan pozdrav leti
Hrvoju na interneti
Uređuje kad ne svira
On stranicu od Bribira.

TAMBUR

ABUKAT

Neznan stel to ljudi znali
Početak je bil na Kali
Obljetnica jedna mala
Tu se slavi noć od Kala.

Antonac je totu Žarko
Brat Ivica, bratić Darko
Si seljani prilog daju
Jidu, piju i pivaju.

Okrenuli su i janje
Još dok svitloj bilo danje
Puno mesta su imeli
Na klupicah su sideli.

Te klupe su baš z Kičera
Od Dražena zeli Mera
A problem je nastal veli
Kad su vrnut to oteli.

Darko veli bez nervoze
Smanun klupi nek se voze
Još dobiva pomagača
Radu koti suvozača.

Problema tu nebi bilo
Da previše nij se pilo
Klupe lipo su vrnuli
Nigdi nisu se zvrnuli.

Ali tek počinje scena
Kad su makli od Dražena
Darko kroz brki mrmoli
Dal moren ovuda doli.

Rade njemu mirnin tonon
Tud gre Aco kamionon
Krenuli su poput vetra
Ali samo dva tri metra.

Ovo nij za analizu
Kuće dvi su tu preblizu
Kombij zapel med dva zida
Usko zada, usko sprida.

Nives s dicun čeka doma
Ovi dva totalna koma
Matija pak sakog sata
Pita mater kadij tata.

Konačno jej dočekala
Ciplju v rukah je držala
Pa va onoj svojoj boli
Raspalila po renoli.

Stukla vrata i pol krova
Serijaj to sada nova.

Željki Jurčić pusa vela
Ronilačka dva odijela
Da bude se kako valja
Kad se kupa na Tri kralja.

TAMBUR

SUDAC

Nič ostavlja vavon letu
I za Darka on Muretu
Novu enciklopediju
Za «Kariku najslabiju»

Neka hiti onu staru
Mesto Košljun nij na Hvaru
I neka ga zdravlje služi
Neka mu se množe puži.

OSTAVINA

ABUKAT

Mesopustu ode glava
Ostavinskaj sad rasprava
Po redu ja krećen sada
Prva Bribirskaj parada.

Jednu umjetničku sliku
Daje Mili kapelniku
On predvodi dečki mladi
Trejset let je va paradi.

Kapetanon štopericu
Jer po noći straše dicu
Rekli ljudi su z Kičera
Na deset su tek u Mera.

Televizor ti pobeli
A parada još je v seli
Baren kuće su oprte
Kad birtije su zaprte.

Još za naši kapetani
Jedan renol blindirani
Danijel i Svetić Deno
Crveni se vozi reno.

Dva dana su v gori bili
Nikomur se ne javili
Od jutra pili do mraka
A prespali u Tićaka.

V rikverc Darko valje hita
Više Radu niš ne pita
Ali kombi ni da čuje
Zadaj još i stup od struje.

Dal vozite vi to dajca
Pita Kate od Bjelajca
Tuda se ne more proći
Ni po danu ni po noći.

Pomoć tribat će in vela
Probaju zvat z mobitela
Al još uvijek trezni nisu
Pa neznadu reć kadi su.

Prije neg će zora bela
Zvukli su ih z toga sela
Još uviki kombi služi
V njemu sad se voze puži.

TAMBUR

SUDAC

Za Radu ja znan i drugu
V Banovuj hodil Jarugu
To već zna i saka bena
Radinaj od tamo žena.

Pa dok joj on misi sasci
Tast hrani njegovi prasci
Antonci ga voze tamo
Po prasci da gredu samo.

Ne živi neg polovice
To san doznao od Ivica
Volan on prepušta sinu
On i Rade po pelinu.

Do gori su brzo stigli
Kućanstvo na nogi digli
Piju sakin kij tu v rodu
Šljivovicu kot i vodu.

Raspravu vode žestoku
Samo Igor je na soku
Slažu prasci va „Iveca“
Dug ih put do domu čeka.

Igor vozi na pol gasa
Od ovih dvih niti glasa
Oba spidu mili ljudi
Ivica se za sna budi.

Usta su mu skrozi suha
Al je mokar do pazuha
Razgovara sinon svojim
Ovako se ja ne znojim.

Snašla sudba tu gaj lipa
Popustilaj Radi pipa
Ne pada v kabini kiša
Popišal sej nij znel miša.

Kljane Aco spušta Bogi
Mokre su mi obi nogi
Briga Radu ča mu jebu
On je još na sedmon nebu.

Totu pitan «IZDAJNIKA»
Zač ne kosi spomenika
Zač je smutil ovu kašu
Oće prodat lipu našu.

Pljunul si na djedovinu
Kad si izdal Gotovinu
Otkucal si sakog borca
Kriv si i za Mirka Norca.

Zajebal si sih od reda
Još si crtal Muhameda
Nikogar nij ki te voli
Za oprost me tu ne moli.

I nagradu dal si celu
Ciganu na RTL- u
Misliš da san veslo sasal
Za Hamdiju ti si glasal.

Subotun je slabo v domu
Veliki si krivac tomu
Narod se se manje smije
Niš nij ko čaj bilo prije.

Ljudi se ne mačkaraju
Doma su i ne zihaju
Tako «Venus» večer svira
Za pet ljudi iz Bribira.

Bil si dosta na životu
Osuđujen ja te sprotu
Kuvertu ne znimlji plavu
S gušton rižen tvoju glavu.

(UDARAC SABLJUN)

TAMBUR

I va Otočcu su bili
Velu feštu načinili
Bribira će bit sakuda
Dok je bribirskoga KUD-a.

TAMBUR

SUDAC

Kakovo će bit nan zdravlje
Dok ludilo vlada kravlje
Gripu ima perutnina
Ostaje nan svinjetina.

Čin beba napusti dojku
Mora mlatit po odojku
Po ucvirkih i slanini
Nesmi blizu piletini.

Ekonomski smo na nuli
Sirotinju saki guli
Briga onih va sabori
Ča Hrvat za kruh se bori.

Sigurne su in dnevnice
K – 15 i božićnice
Kupe vilu i tvornicu
Da pomoru svoju dicu.

Va zatvor su pokladali
Heroji i generali
Još su pozaboravljali
Onih ča su zavo pali.

Prvi zavoj Igor staje
Ocu svomu ruku daje
Pa tako po danu belu
Sele Radu va kaselu.

Nisu se ni obrnuli
Čaj daleko ispod nuli
Radu va snu muče brigi
Šmrklji z nosa dvi su sigi.

Više mu se ni ne piša
Ne zna ni dal ima miša
Ne zna ure niti dana
Misli Matić je poljana.

Istinaj to ljudi živa
Sa pol prasca se pokriva
Dobre su i polovice
Ako nimaš ponjovice.

Preživit će ima sriću
Stali su na Tuhobiću
Dvi su rundi okrenuli
Va život ga povrnuli.

TAMBUR

ABUKAT

Obrt stari va Bribiri
Od našej frizerki Miri
Sandra gori ordinira
Va penziju prošla Mira.

Pa va šumi se odmara
Uspat uči za zidara
Zač sej tamo ona bila
Sa puhimi zaratila.

Jedan puh ju tu nervira
Stat će njemu na kraj Mira
Maloj melti zamišala
Na drvenu stubu stala.

Zameltat će školje ona
Sjebat puhi bez pardona
Pa se penje na etažu
Zaboravlja na kilažu.

Kad visoko sej popela
Puklaj stuba na dva dela
Hljopilaj ozgora doli
Mili Bože se ju boli.

Ali zračni su jastuki
Sačuvali njeni kuki
Zafaljuje činjenici
Višku sala na guzici.

Al druge ju brige brinu
Fale ovce v Poduljinu
Dolika sej ona bila
Ovčicama posvetila.

I peljala ih na pašu
Akoj majka šla na mašu
Lopovi su bili v štali
Tri ovci su joj ukrali.

ABUKAT

Slušan svoju glavu ludu
Ni besedi još o KUD – u
Povidit se mora slovo
Za vezove i Đakovo.

I za podrum Kutjevački
Tamo pili su znalački
Tu se vino degustira
Saka boca se opira.

U župnika obedvaju
Tamburaši mu sviraju
Slavonsko in vino leži
Večer spidu va Bekteži.

Tancat v Đakovo su stigli
Dvoranu na nogi digli
Ne spi se do drugog dana
Valjej v jutro karavana.

Tri dni su na putu bili
Oka nisu ni sklopili
Jagodaj s četrtin danon
Zaspala al za volanon.

Celo autoj razbila
I par črnic je dobila
Bitno da je glava živa
Najlipše va KUD – i piva.

Naš KUD prijateljstvo širi
Bilaj smotra va Bribiri
Segaj tu va izobilju
Triba pofalit i Hrilju.

Kompas zgubil je iz vida
Va opela gol on sida
Ni sam nezna kamo kreće
Al auto vaŕgat neće.

Za pol ure on se koči
Pobebele skoro oči
Ne osjeća svoga prsta
A nigdire živa krsta.

Daj tu večer popil soka
Ne bi tresla se laloka
Smrzle su mu vaton seli
I tipke na mobiteli.

Sam po noći tako plazi
Do cistarske stiže bazi
Ostrašili su se lika
Jutrić, Začek a i Dika.

Si gljedaju v njega belo
Jel ov prišal iskat delo
Šlape su mu tu obuli
Med živih ga povrnuli.

Česan žuli i slaninu
V kuhanon se grije vinu
Draško smeti tud pobira
Hitit će ga do Bribira.

Za par dani nova slika
On dobiva nasljednika
Čekaju ga lipše zore
Sad neka muj mirno more.

TAMBUR

Marijan se s tin ne miri
S paradun gre po Bribiri
Saku kuću obilazi
Da ovce kadi ne spazi.

TAMBUR

SUDAC

Pomalo po nikon redu
Za lovci gren reć besedu
Društvo to je najbrojnije
Kad se puca, kad se pije.

Fanj su ovu zimu bili
Toga blaga pomlatili
Oni mesa ne kupuju
Ali nikad ne miruju.

Kot pokojni maršal Tito
Jelenaj otresal Vito
I jedan mi veli znalac
Daj to jelen kapitalac.

Noć je već pretila danu
Kad sej našal na nišanu
Dosta bil je metak prvi
I jelen je već va krvi.

Da se zvuče to do puta
Kompanija triba ljuta
Dok ne svane svitlo danje
Triba poč po pojačanje.

- 14 -

V kombi jelena krcaju
A onda ga zalivaju
Poli Zubi runde lete
Od pol noće pa do pete.

Tu su ga rastranzirali
I sakomu par kil dali
Glavu sikli su na panji
Pa va Vrbu naose k Janji.

Vlatko, Dario i Vito
Totu časte temeljito
Pije ki va Vrbu kroči
Janja simi nek natoči.

Rogi simi kažu oni
A glavaj va najiloni
Janja glavu gljedat neće
Želudac joj se okreće.

Ponosno se Vito smije
Jegermajster tu se pije
Na telefon zove ženu
Da zajedno dalje krenu.

Anita ih sada vozi
Va Grižane gredu skrozi
Da još za ovoga dana
Rogi vide u Deana.

Samo neka love dalje
Udruga in pozdrav šalje
Dali su va jednon šutu
Dvisto kremšnit za redutu.

TAMBUR

ABUKAT

Pričaj ovdi jedna mića
Našeg Ivica Krstića
Toj onaj ča oko vrata
Nosi kilo i pol zlata.

Pitaju me niki znanci
Od opela sul to lanci
Pa da dečko nima brigi
Ako bi se našal v snigi.

Leta gredu on ne stari
Za godine baš ne mari
Nediljun je va paradi
V belih gaćah on je v gradi.

Kapetani si ga fale
Šef muzike on je male
Vele selo kad pozdrave
Onda dalje šnjn nastave.

Va Grižanih tužna slika
Pa gredu do Drivenika
Do Romea va birtiju
Da i tamo ča popiju.

Kako noć se bliži kraju
Samoga ga ostavljaju
Vani šest je ispod nuli
A postoli su se zuli.

I gemišť va čaši hlapi
Nij na nogah ni čarapi
Na propeler mirne duše
Obisil jej da se suše.